

明名臣言行錄

明名臣言行錄卷第八十九

太常少卿鹿忠節公善繼

字伯順號乾嶽定興人萬曆癸丑進士官至太常少卿卒於破城之日年六十有二南都追謚忠節公端方謹恪歸如斷山與吳郡周公順昌吳橋范公景文襍被蕭寺雞鳴風雨以節義相期勉選戶部山東司主事職鹽法爬搔利病洞悉原委丁內艱補原職以河南司署廣東司事遼左方闕餉請帑疏皆不報會廣東解金花銀五萬至公奏記大司農李公汝華曰金花恭進大內此近例也頃督部有扣留之議此

時仍進大內則部議終成畫餅欲徑解太倉則俞旨艱如拔山莫若題留爲便請一面題知一面劄納銀庫轉發遼左權自外操庶不至如帑金之緘滕不可問司農如公議上請神宗怒奪公俸一年勒令補還司農不敢違公力持不可謝恩日中官闔門扇不聽公出勒問太倉云何管太倉主事劉榮嗣曰發三日矣然實未發也中官傳嚴旨促令補還公曰有銀安用借無銀又安從補中官愕眙不敢應公曰但執善繼語回奏死生有命不敢易隻字也中官歎息而去無何司農奪俸二月公降一級調外任舉朝交章請

留不報公遂告歸

光廟登極首復公官典新餉改兵部職方司主事是時遼陽初失中外洶洶公受事誓天淚流浹面杜絕請託申明法紀歲壬戌孫公承宗以閣臣理兵部事公從孫公闕歸遂委心焉孫公自請督師公請從吏部司官缺太宰堅以屬公公不可曰相公一日在師中卽一日在幕中鹿繼善鬚眉如戟肯回頭作吏部郎乎孫公當關四年實倚公爲左右手及孫公解兵柄公亦移疾乞歸周旋戎馬未嘗以邊吏邀一階半級以久次轉員外陞武選司郎中家居四年杜門却

掃至邑有利弊則必爲民侃侃請命烈皇卽家起公爲尚寶司卿陞太常寺少卿管光祿寺寺丞事精勤吏事夙夜在公一如爲郎吏時未三載復請告歸

崇禎丙子七月大兵攻定興公方移疾村居公念定興當涿南保北屏障神京遂辭丘墓令子化麟侍父於鄉援兵登陴七日城破公守南門兵從西北隅上挾刃索衣公嚙齒大罵兵怒甚砍三刀復射一矢而死明年正月子化麟伏闕上書言臣父以無備之城必破之邑獨堅誓死之心衡拒方張之敵不獨城存與存効勿去之義抑欲人戰家守折南下之謀設人盡

臣父則九塞可寧率土可保是臣父爲一城死義小
爲天下死忠大也疏上下部贈大理寺卿廕一子入
監子祭葬卹典特優是冬化麟亦以苦次哀痛死至
甲申追賜謚特祠曰忠烈

尚書呂忠節公維祺

字介孺號豫石河南新安人萬曆癸丑進士官至
南京兵部尚書崇禎辛巳賊陷雒陽公被執大罵
以死贈太子少保廕一子南都追謚忠節

授兗州推官清執有名丙辰大饑公躬自賑濟全活以
萬計復行保甲法後白蓮妖變起兗城卒賴以全乙
卯戊午兩入省閏己未以卓異徵入爲吏部請托餽
遺概謝却無所徇

庚申光皇崩熹宗未立公上疏請蚤正位畧云殿下
一身天地人民之主起居問誰翼護飲食問誰調視左

明倫彙編 家範典 卷之八
右問誰釐肅侍御問誰防閑閣部大臣輪番入直宜
於宮門近地日同科道等官朝夕問慰所以開心定
志杜漸防微者無所不至至於親近內侍擇老成忠
謹數人以重厥任不得干預政事紊亂祖宗成法以
服其有先見

甲子告歸山居學道不干世事作石隱傳有同籍諷之
起者公答書有士守道猶女守身之語會天中建逆
祠公不與璫將中以危法會璫敗中寢

崇禎改元薦起尚寶卿改太常少卿尋遷正卿公疏言
君德時政八事上嘉納之庚午陞南京戶部侍郎兼

僉都御史總督糧儲先是上以南糧逋欠日多特賜勅一道有侵欺錢糧者五品以下就便提問公念上簡任甚重而南倉積弊最深州縣徵糧大抵急北緩南又浙西蘇松例以南糧派之宦戶始不過利其地近費輕而後乃有豪僕包攬積逋五六年不上納及私收折色乾沒入已者行州縣提解率以空文具覆甚有虛起批文報完或已解府司復那借別用至十餘年臥批不掣州縣官既視南糧爲不急之務而自神宗末年以來邊事告急戶部疏請借支南部本折銀米至二百六十四萬有奇於是南倉入少出多以

至官軍俸糧有欠至一年未給者先已呼譟辱司官矣公乃悉心籌畫先疏湖廣原留黔餉一十三萬石歸之南部復條奏振刷十事及請開爐鑄錢舊例糧米或交倉或交場各有主事監之倉則三篩三曬而場不曬以給軍士謂之水兌故倉耗加一場耗加二五公示各解戶有當交倉願改場者聽仍薄其耗以勸之而又以囤基不足命於空倉隨便收納卽准水兌每年得耗數萬石以佐軍糧之乏而錢故有夾鑄之弊每爐加私銅數十斤官與匠分之公命繕廠垣嚴巡察申薄小錢之禁而謂速鑄則利在官遲則夾

鑄多而利在下舊三十日一鑄公改十五日一鑄連
放鹽米共十八日凡兩月三鑄停爐之日必盡放匠
役出之鑄速而私錢少又取錢糧解支數自寫一簿
而自銷之不入吏胥之手嘗曰昔人有言人至察則
無徒第思國家多故君父焦勞爲臣子者豈能自己
公之立心如此

乙亥賊自汝寧來走鳳陽犯皇陵北出陷潁州公遣都
督趙世臣以兵三百人守關山潰走烏衣南京大震
廷議多咎公遂以考察奪職家居

辛巳李賊陷雒陽焚福王府迹王所在執之并執公公

遇王於西關謂王曰名義甚重毋自辱王見自成色
怖泥首乞命自成責數其失遂遇害賊置酒大會以
王爲俎雜鹿肉食之號福祿酒公罵賊不屈死贈太
子少保廕一子入監弘光朝謚忠節

尚書盧忠烈公象昇

字建斗號九台直隸宜興人天啓壬戌進士官至
兵部尚書總督宣大崇禎戊寅死於賈庄之戰贈
戶部尚書謚忠烈予祭葬蔭一子

初授戶部主事陞大名知府遷山東副使崇禎二年大
兵薄京城公投劒奮袂率師勤王兵退遷按察使大
名兵備流賊起公徽州縣治守具自馳騎督察卒遇
賊數萬公弗却額中流矢不顧會後兵至乃免賊衆
趨府城而分兵攻滑公戒守城士勿動自選精騎設
伏擊敗之斬級數千賊相戒不敢犯而南渡河公以

是有能兵名

七年賊破鄖陽命公以僉都御史撫治九年巡撫湖廣
尋加公兵部侍郎兼副都御史總理七省時滁州告
急公疾赴援與賊遇連戰大敗之賊走承天公率衆
追之爲賊所圍公與諸將疾鬪殺賊近萬人賊遂請
降

十一年大兵入宣加公兵部尚書總督宣大山西公上
疏言撫西不撫東許市不許賞樞輔楊嗣昌故主撫
與公議不合嗣昌奪情始猶以墨綬治事後遂欲從
吉少詹黃公道周廷諤遭遠謫公馳書諷之曰變禮

易制誠非細事但使相業無愧救時是或一道嗣昌
答曰某決不讓南陽李也公笑曰羅倫復官正在何
日蓋指道周云公丁外艱乞奔喪疏十上乃允仍令
候代會大兵復入公麻衣草履奉詔督師入朝陛見
面奏曰旣命臣督師臣意主戰上變色久乃懌曰朝
廷原未言撫公曰敵之所患着着宜防逼陵寢以震
人心一可慮趨神京以撼根本二可慮厚集我兵備
之則寡發而多失分兵以四應則散出而無功兵少
則不備食少則生亂此禦之難也上壯之命與嗣昌
議公守前說嗣昌意沮徒戒勿浪戰公遂受命至昌

平督諸大帥各選勁旅將分道襲其營鎮守內臣遣書尼之公疏請分兵嗣昌撥宣雲晉三鎮屬公不滿二萬公慷慨誓師刻期決戰嗣昌復沮之令赴通州就內臣高起潛公嘆曰樞輔不過欲撓我師期耳會嗣昌至軍中公厲聲責之謂公等堅意言撫獨不聞城下之盟春秋恥之乎且某叨劍印長安口舌如風倘唯唯從議袁崇煥之禍立至縱不畏禍寧不念衰衣引紼之身不能移孝作忠奮身報國將忠孝胥失盡喪本來何顏面立人世乎嗣昌色戰奮言曰公直以尚方劍加我到耶公曰尚方劍須從已到下過如

不殲敵未易加人若舍戰言撫養禍辱國非某所知也嗣昌曰無之公曰講撫之使往來不絕始事於薊門督監受成於樞部京營通國共聞將復誰諱是時公已削尚書銜而兵鋒持銳士樂爲用前所破州縣旬月間多克復樞部忌功輒從中沮翰林編修楊公廷麟奏曰南仲在內李綱無功潛善秉成宗澤飲恨國有若人非封疆福疏入謫軍前贊畫公謂廷麟曰敵勢盛不走陵卽走京我不戰敵益輕我戰卽生他端公爲我往真定乞糧我悉兵乘死以報國矣而自率騎兵五千迎戰至賈莊與大兵遇前師奮勇馳擊

敗之明日大兵益壓壘總兵虎大威戰小却公大呼
曰虎將軍今日吾輩效命之秋也無自愛乃招後騎
皆往公奮刀入擊殺十餘人身中二矢二刃呼不已
曰關羽斷頭馬援裹革在此時矣馬蹶陳亡三軍皆
爲流涕公死踰四年嗣昌敗天子思公乃贈戶部尚
書謚忠烈予祭葬蔭子恩禮有加云弟象觀字幼哲
崇禎壬午解元癸未進士授中書乙酉之變起兵不
克而死

尚書孫公傳庭

號白谷代州人萬曆己未進士官至兵部尚書總制各省崇禎十六年死於潼關之戰未贈諡而國亡

初知永城調商丘有能名行取吏部歷四司員外郎中陞順天府丞以邊才擢右僉都巡撫陝西其涖秦嚴徵發期會一用軍典法秦人愛之不如洪丞疇然其才自足辦賊闖王高迎祥已陷漢中之石泉由陳倉子午出將闕西安公以七月二十日戰於盤屋之黑水峪當陣生得迎祥及其領哨黃龍偽總管劉哲三

人檻車膠致京師膊之於市未幾以辭邊督上怒下獄

辛巳起兵部侍郎總督陝西癸未加尚書賜劍總制各省督師勦寇

十一年八月承疇與公并兵逐賊大戰于申宜者移日尋遇賊邠寧間身自陷陣獲其渠皆俘之餘黨尚盛豫賊馬進忠馬光玉毆宛雒之衆將其輜重而西叩關思入關吏傳遞曰賊來甚衆將士或失色公按劍怒曰逆徒自來送死可勿擊耶乃辭承疇東出關嚴陣以待賊徂於便利驟見大軍而驚恃其衆前鬪公

麾士擊之賊拔營還走公意豫撫常道立必移軍倚
角而理臣熊文燦偕鄖楚二撫或營其前或絕其後
則我之取混狇可以百全既久期不至而秦將士亦
疲乃收其卒傳諭商雒朱陽蘭草諸監無令得入而
已

九月己亥公次汝州僞都尉四天王李養純帥所部來
降知賊并兵守寶豐公進軍寶豐合圍之賊堅守不
下壬寅自成以輕兵來援戰於城東白廣恩高傑盧
光祖分兵逆戰却之癸卯復以精騎數千直攻官兵
諸將復擊走之公曰寶豐不卽下而賊救大至則腹

背受敵矣親督諸軍悉力攻城拔之斬僞州牧陳可
新等數千級遂以大兵擣唐縣時賊家口盡在唐縣
賊發精騎來援官軍已入城盡殺賊家口賊滿營痛
哭

公自朱仙鎮而南大雨六日糧車日行三十里又道淖
未至士馬俱饑已酉命河北山西就近餉公軍自成
將步騎萬餘逆戰官軍前鋒擊斷自成坐纛進逐之
賊被靡賊營逃亡者相屬時公前鋒盡收革左故部
皆致死於賊而高傑統諸降賊備悉賊中曲折自成
遣其弟一隻虎逆戰三戰三北自成奔襄城諸軍進

逼之自成累敗而懼挑土築墻自守已食匱賊有饑色。

十月洪承疇謀於公曰自吾與賊戰於羌中戰於洮河比再遣馬科賀人龍追之於陽平白水李自成勢窮蹙必奔潼關公能於其地設爲三覆以待俾吾蹙而致之可一戰擒也公乃於潼關原依丘阜蔽林木每五十里而立一營曹變蛟躬執長刀驅賊賊奔入伏中亂相蹈籍我軍驍雄跳盪無不一當百飛走路絕遂無所逃其幸免者或棄刀與騎迸逸漢南之山中村塢山民又預奉督撫教令用白棊遮險遇輒棒殺

秦賊遂盡降者猶數十萬委仗如丘陵或分隸鎮將或散歸農畝李自成妻女俱失從七人遁

時九邊精銳悉隸麾下將憑巖關爲持久且固將吏心秦士大夫弗善也累檄趣之戰不得已始出天淫雨糗糧不繼師大潰潼關陷獨身橫刀衝賊陣以沒從

騎俱散不能得其屍

標下監軍道副使
喬元桂亦同日死

公之出也自念必死顧語張夫人夫人曰丈夫報國耳無憂我西安破率二女六妾沉於井揮其八歲兒以去兒踰牆避賊墜民舍中有老翁者善衣食之二年公長子世瑞重趺入秦得夫人屍貌如生老翁歸以

弟相扶還見者泣下蓋公有德秦人云

韓聖秋曰按公潼關之役從峽渡河與總兵牛成虎訣以幼子托之遂登山痛飲投白馬於河伯尋赴洪流而死猶遺一羚羊角於山頭望見白馬出沒洪濤中此諸城丘通判爲予言如此丘時屬監軍其言或非無據姑並存之

初進士程源疏言殲大寇必圖大舉須合數十萬環攻之誰應援誰聲實誰牽制誰批腹着着炤應使賊應接不暇然後一鼓成擒乞勅孫傅庭憑關固守勿事浪戰不報十月初六日賊伏精銳於關前以疲弱引

公府出遂奪關而入破西安按察使黃綱自盡巡撫
馮師孔被執不屈死之長安知縣吳從義指揮崔爾
達俱投井死秦府左長史章世烱自經死都司吏丘
從周遮道罵賊死外有西安知府簡仁瑞罵賊最烈
賊揮爲數段死慶陽推官靳居聖自刎死

尚書傅公宗龍

字

人萬曆

進士官至兵部尚書崇

禎十四年陷賊而死

廉介有爲以侍御巡鹽於浙有常例四萬金却不取監
貴州軍執詐降誘殺王巡撫三善土酋陳其愚時履
行間身親介胄水藺之勦助望蔚著填撫有聲十二
年八月以才望繼楊嗣昌爲兵部尚書十二月洪承
疇請用劉肇基爲團練總兵時高起潛又揭肇基悞
怯不堪將擬議間上遲之以抗藐責回話以阻撓戲
視封疆下獄十四年五月釋降侍郎兼僉都充爲事

官督陝九月初六日會保督楊文岳勦賊於河南至
龍口遇賊公身先率李國奇等擊退之已賊合股至
所部賀人龍虎大威及國奇陳監軍俱逃公猶與楊
結營相倚迨夜楊所部潰楊亦走項城公猶拒守初
九公密書招陳監軍李賀俱不應受圍十日十八日
糧餉已絕公身先突陣馬蹶被賊執擁之賺項城大
呼於城下曰我秦督官兵也請啓門納秦督公隨呼
曰我不幸爲賊執左右皆賊耳勿開門第發炮我與
賊俱盡耳遂見害事聞上以爲雖不成功殉難亦見
節烈還原尚書官贈太子少保蔭子

巡撫王公漢

初名應駿字子房山東掖縣人崇禎丁丑進士官
至僉都御史崇禎癸未死於劉超之難贈兵部尚
書廕子錦衣衛世襲

除高平知縣調河內邑大饑貸萬金易粟於淮徐浮河
而上且捐俸減糶煮粥以賑復因以修城垣募壯士
巨寇劉二將以正月三日攻濟源濟源告急公佯不
應於除夕出賊不意赴之以元旦登天壇山山陡絕
數仞遊者或用數人以布牽挽乃登公獨持刀直上
遂擒劉二又乘大雪至山西破妖僧智善夜半渡河

破賊楊六郎皆以奇險奏功會李自成攻汴甚急外
援弗前公乃率親兵至金龍口柳林諸處以大礮火
炬爲疑兵遣死士入賊中聲言宜大及左鎮兵來援
自成之圍稍寬當是時公威名動河北

公爲人負氣愛才人有一長必稱之不容口獠屬紳士
有能陳民疾苦及言公過者則瞿然下拜麾下有能
爲公辦一事者經年不忘用兵與士卒同甘苦故人
皆樂爲之死先後破賊皆縱間謀入賊中賊中舉動
無不預知賊圍汴不通音問公之死士能達書於巡
撫高公又盡得闖曹袁諸賊虛實都下稱知兵者必

曰王子房云

十五年三月減俸行取天子召至便殿咨天下事公指
勦撫大畧當上意立拜御史視左良玉師與督臣侯
恂援汴兵部發援勦兵十萬公所監凡五萬九千然
多空籍耳公請自立標兵千人騎二百報可乃簡保
營兵百人募鉅鹿邯鄲壯士三百人又取故治河內
所練義兵及修武濟源素從征勦者五百人合親丁
百人共千人八月朔半夜襲賊於范家灘斬一紅甲
賊目檄諸將合勦公自走襄陽督左兵救汴至潼關
而巡方之命下

先是公有秘疏言良玉遇賊相戒兵士唯打活仗臣見
良玉曉以大義感以血誠如其稍有變志臣不難披
肝相與廣朝廷使過之仁倘怙惡不悛臣惟有一死
謝皇上必不肯效故督丁啓睿以制府重臣而奴顏
婢膝於良玉之前也上留中不洩第時嘆息於輔
臣之前曰河南巡撫安得如王漢者政府乃改公按
豫會汴城陷沒公督諸將自柳園渡河伏兵西岸檄
卜從善等夾攻之斬九十餘級遂入汴大張旗鼓追
賊至朱仙鎮連戰皆克

擢右僉都御史巡撫河南是時各營缺餉計部之虛文

無裨緩急始聽兵士搜牢而食盜賊日盛公深念者
久矣而萊蕪諸生李櫛生以策干軍門謂河南屯田
之地東則行於西華阻水而守以女媧城爲水寨以
東舉爲陸寨跨鄆陵通許商水扶溝盡人力可數年
不雨而不饑設二正將四都司歲屯六萬頃用助法
可養精兵三萬東連渦潁北控梁宋西則太室少室
熊耳盤薄淩阻內多民寨亦用四都司屯近山之田
用貢法養兵三萬以據虎牢其許襄鄭葛亦以四都
司屯用助法於禹州駐撫標三萬分一副將駐呂布
城南扼山寨北距大河則汴維可以無恐復移河北

兩鎮分駐汝州南陽賊犯汝則西華應之舍汝而北則汝鎮尾之西華出奇兵邀之賊犯南陽則禹州應之若舍宛而北則宛鎮逐之山寨鄉兵晝撓夜劫俾無所掠則漸饑漸疲賊勢必當瓦解公納其策

會劉超難作超之叛永城也與其鄉御史魏景琦舉人喬明楷生員王奇珍有怨擅殺三家百餘口遂據城以叛公疏請討之奉密旨以策授公乃爲樞臣新甲洩於侯恂恂以語超超得爲備公以十六年正月十九日率兵抵永城聲言招撫二十日邑人練國事丁魁楚夜開北門納其軍公坐城頭發免死票超死士

發遇害叅將陳治邦游擊連光耀父子及家人劉
璽張金皆戰死游擊馬魁復力戰入城負尸以出至
夏邑爲之棺歛河南北士民皆哭失聲上聞嗟悼贈
兵部尚書蔭一子錦衣衛百戶世襲五月超被擒俘
京師磔之傳首九邊

公初受事時勦賊之兵惟恃邊帥而許定國寧兵全謀
白邦正侯大節馬烜各部亦逃皆十之六七公言國
家養兵不爲不厚平日糜餉則有兵沿途淫掠則有
兵及至大敵當前則無兵夫兵之謀噪非一人亦非
一日其將領非不知之以爲一渡大河身犯不測盼

兵之謀惟恐不速然則將領之誅旣不可道逃兵所
過地方官得勒兵捕斬回籍者有司緝獲俾其無家
可歸庶在伍不至生心矣其議論切中要害如此

明名臣言行錄卷第九十

巡撫蔡忠襄公懋德

字公虞號雲怡崑山人萬曆己未進士官至副都御史巡撫山西崇禎甲申二月太原破自殉南都予贈諡忠襄

弱寇登丙午賢書試禮部不第歸閉門絕干謁讀先儒語錄得陽明書嘆曰道在是矣是故學日精而文亦日進己未成進士授杭州推官平允明恕獄無冤民而冰蘖之操著於屬內秩滿內徵授儀曹郎隨乞封光澤王差禮畢歸里題所居曰不隨室

崇禎改元陞江西按察司副使視學政號稱得士於是
極昌明陽明之學刻傳習錄於白鹿洞標洞規八條
纂真朱子錄以申朱王合一之旨創書院禮請鄉大
夫力學者主之日與諸生往復其中著管見臆測若
干言大抵統良知合至誠要格物致知而以知及仁
守莊蒞動禮爲階程以發憤疑問濳造自得爲功效
次第自陽明以前周程以後兼綜條串而正學昭焉
壬申備兵嘉湖湖盜屠阿丑踞湖有年而海寇劉香游
船猝至至是撫按議合南省兵會勦公曰此可計擒
也柰何警擾吾民且兵聲先聞彼颺而入海與劉香

合害叵測矣上官然之一以其事屬公公密捕窩盜家貫其死散歸湖濱約曰有捕卒至湖者第舍之假捕卒爲估買兒先後踵至約日齊發丑義兒沈千斤者有驍名捕人起擒盜沈力戰被傷阿丑奪氣遁捕卒散估者扼於隘互持陷水澤中追者生擒之盜平撫按上公功廷臣皆薦公知兵無何以艱歸

公雖家居窮民冤抑地方利弊當路者皆得公一言爲定直指祁公亦造廬請教故治聲振於時

服闋補井陘道進左叅政甫三月而調寧前初寧前道闕員已除有人而遼撫方一藻特疏薦公公耻關寧

總監高起潛之當會疏也疏辭曰寧前重地臣不諳兵事未敢任也夫知小而謀大者凶萬一試而不效臣不足惜如封疆何哉且臣與監撫有何生平而謬謂臣知兵不報公乃與家人訣曰吾不顧矣於是遣間諜覓文法革濫冒備修軍政貸商錢以濟軍餉時祖將軍大壽鎮邊久士卒頗橫公徐謂大壽曰邊事急幸將軍信令嚴人樂爲用然部下士魚肉商民將軍不知也某請爲將軍治違令者大壽悅遽戢士卒時關外八城歲受攻圍公不解甲於松山者四十七日於寧遠九日而八城以完廷臣議守松功在文職應

敘者一撫一道一判遂加撫一藻兵部尚書加通判
朱廷樞按察司僉事各廕而公獨弗及反謂公清修
弱質宜調腹用

上因災青詔內外言事公極言省過莫如改過而治平
之要則在研大學明德爲內聖外王之學究之天心
之復係皇上一心之通豈有聖心朗若中天而朋黨
不消災眚不弭制敵不勝之理疏上上以爲迂而執
政多齟齬奉旨切責

調濟南道濟南甫殘破公日撫創招流舉諸廢墜却泰
安守金帶并泰山香稅羨金若干遂於次年遷山東

按察使隨進河南右布政適河南饑斗米三金人相
食催科無所應而闖賊流言降城免征民日夜望賊
至公曰此非催科時也檄停徵抗疏自劾落職七級
推山西巡撫上特召見於中左門賜膳問撫綏之要對
曰天下變亂皆由民窮爲盜臣任撫綏當先使窮民
有食耳然愛民先察吏察吏莫先臣自察願正已率
屬俾民不爲盜而臣無可見之功不願殺害百姓以
成一己之名上悅賜表裏銀兩

壬午春公赴任榜其門曰願聞已過求通民情

此陽明語也

復講學於三立祠大寇王冕等先後爲亂平之

九月京師以邊警徵天下兵入援公已應徵而遽有阨防龍固之命自十月設防至癸未五月撤防凡七月以罷勞請告旨未下而闖賊已陷河南將渡河公禦之蒲澤不得渡乃西向潼關秦督孫公傅庭以朝中催戰十萬精兵一朝而潰三秦瓦解長河二千五百里之防山西獨當之公南北策應大慶風陵兩挫賊鋒會高傑統潰兵入汾州攻剽公甫調戢而賊西破榆林岢嵐告警公急上疏以爲賊聚而攻我分而守是以一往無堅城也自今以往請分發禁旅并調真保大營諸兵合之晉衆背關一戰尚有可爲否則畿

輔以西恐成破竹之勢矣不報冬保德州告急馳歸
省城守河道將聞警奔潰平陽遂陷公尚留守太原
忽奉旨革任聽勘或勸公因此解任或移鎮候代公
不可遂誓衆死守賊馬步號五十萬公登陴禦賊殺
傷甚衆裨將朱孔訓牛勇戰死已而城東南角樓砲
裂焚毀風霾陡作對面莫辨公知事不可爲草遺疏
藏衣幅間守門將張雄爲賊內應賊遂入城公出遺
疏授贄畫知縣賈士璋引佩刀欲自刎爲衆所奪中
軍應時盛扶公上馬欲衛公出城公躍下馬曰吾封
疆之臣應死封疆汝輩自去遂至三立祠惟時盛相

隨公南向自縊軀輕氣未絕時盛解帶一甲覆公肩候
氣絕亦自殺時甲申二月初八日也文武將吏與公
同死者方伯趙建極等四十六人太原破後甫踰月
而京師陷矣

公在危城中語人吾學道多年已勘了生死今日正吾
致命時也其所見超卓如此

知州王忠愍公燾

字濬仲號函符崑山人萬曆戊午鄉薦歷官隨州知州丁丑城陷自縊死贈太常寺卿崇禎末補謚忠愍

少孤貧賦至性九歲出嗣有從叔圖嗣產謀擠之河公忽心動奔歸後嗣祖柝產且鉅萬公悉以讓叔獨迎養嗣祖母及母惟謹萬曆戊午舉於鄉授海門教諭丁母艱補儀真却諸生贄邑令墨絕弗與通陞解州知州未任丁祖母艱

崇禎九年補隨州隨故流寇出沒地或憂之公曰臣子

明倫彙編 家範典 卷九十一
敢擇地而蹈乎星馳赴任練鄉勇審偵探釐馬政設
攔木有土寇李良橋等潛伺爲亂先計殲之不數月
獻賊猝至攻圍甚急公身冒矢石且戰且守殺賊千
級賊有隨州紙城變鐵城之號相持二十餘日至丁
丑二月援絕力孤夜半烈風大作凜粟如冬關廂守
將王必用先遁西城火裂公知事敗馳入署冠帶北
面自縊死時州治焚惟所縊室獨存公屍危立賊望
見駭去所司察狀尋州印印出公足尺土下事聞贈
太常寺卿謚忠愍其後同邑蔡忠襄死山西之難勅
建祠曰雙忠

巡撫衛忠毅公景瑗

字仲玉號帶黃陝西韓城人天啓乙丑進士官至
僉都御史崇禎甲申抗賊殉難贈兵部尚書祭葬
廕子謚忠毅

司李河南府執法不阿考授山西道御史劾閣臣周延
儒銓臣曾楚卿救工曹靖科元朝論稱之巡按真定
丁父艱服闋補河南道御史巡太倉嚴革陋規時樞
臣楊嗣昌議加勦餉公上疏言不可弗聽給事中傅
朝佑李汝璨疏劾首輔溫體仁上怒下二人詔獄公
爲訟寃會召對極言二臣從國家起見願皇上赦出

以作敢言之氣忤旨左遷行人司正歷尚寶丞大理丞少卿

壬午陞都察院右僉都御史巡撫大同裁缺丁鑄火器戡豪宗聲績甚著甲申二月賊李自成陷太原督臣王繼謨望風遁賊至寧武鎮臣周遇吉告急公趣大同鎮姜瓖提兵往救瓖持兩端不行寧武陷遇吉死之三月一日賊至大同總兵姜瓖以援至城降執公去見自成不屈據地坐大呼皇上而哭自成曰忠臣也勿殺越三日復擁見自成曰爾真忠臣我驛乘送爾還家公曰國破家何在請速殺我自成曰我

不殺爾公奮起以頭觸堦石血淋漓被面絕而復甦
賊竦然命掖公出公初見賊哭而不罵至是見賊黨
無不大聲痛罵賊黨愧甚然不敢加害初六日公自
經於海會寺冠服南面哭稽首而絕

延安推官顧咸正爲之誌曰綱目書劉公幹自經於金
軍以爲金不能以威屈幹而幹自經云爾衛公有老
母又當賊方陽慕公不殺若可以無死而公持義堅
決從容自裁可不謂之得正矣乎南都卹典俱如禮

巡撫朱忠莊公之馮

字樂三號勉齋順天大興人天啓乙丑進士官至
僉都御史崇禎甲申死於賊難南都贈兵部尚書
謚忠壯

甲申三月賊偏畿輔宣鎮總兵王通已潛遣騎迎賊矣
而公尚勞苦登陴與通分城而守飛章上告請援而
城中訛傳謂將請兵屠城人人解體十二日賊入城
滿城皆粘順民跪接公憤甚令將大砲昇轉欲向城
中擊之慢不應公不得已自起拽砲見藥線孔牢下
鐵釘知事已不可爲卽索佩刀自盡亦爲左右所匿

公南面仰天哭曰太祖高皇帝成祖文皇帝今上皇帝臣不意天命人心一旦至此臣死必爲厲鬼殲賊以報國恩二三僕立在側並無一言及後事遂縊死城樓簷下

原缺

知縣吳公從義

字裕強山陰人崇禎庚辰進士授陝西長安令城陷死之

公端方向學曾夢長者撫其背曰歲寒松柏其在斯乎
余字而歲青寤遂更焉崇禎十三年舉進士時謁選
者率營善地公言人登甲第於國家恩厚甚致身分
也避危疆不往豈臣子義且吾儕貧士安取貲稱貸
以圖後不剝民償耶

就選得長安令時秦地大盜充斥兵力不堪公至躬自
操練勇氣稍賈會遣標兵勦南山盜公率所練分路

夾擊殲其渠諸鎮以寧而賊躡楚豫熾甚詔三邊督
師移鎮西安集兵不下數萬供應甚煩公竭力自支
不忍重累編戶癸未春舉卓異未及徵冬十月雒陽
喪師潼關失守長安勢如累卵公竭蹶佐撫軍議戰
守分汎南門而賊自東門入撫軍馮師孔死之公下
城至關神廟乃釋韎鞞整衣冠從容拜闕赴井中死
事聞贈山西按察司僉事

御史劉忠毅公熙祚

字仲緝號劬思南直武進人天啓甲子舉人官至
監察御史崇禎癸未寇陷長沙公被執大罵不屈
死南都贈左都御史蔭子予祭葬謚忠毅祀毘陵
四忠祠

初授典寧知縣典寧俗刁悍民有茹斷腸草懾人得所
欲乃服解藥否者死而爲所誣者家立破公嚴爲之
禁犯者死勿問而又令民得輪草以代贖緩糞絕其
種或曰草可盡乎公曰不然但使吾在事而草不爲
毒繼吾者同心行之勿懈此風可絕矣與學較詰姦

盜境內又安

烈皇帝召海內循卓奏對稱旨擢入西臺卽慷慨言事
疏數十上尤眷念留都請撫軍移鎮以固金陵請表
章詞臣以風後進尋奉命按楚楚事已大壞公至與
左良玉握手欷歔勉以忠義癸未正月荆承報陷三
藩播遷公撫膺泣日門庭旣失堂奧必危倘不能挈
湖南一塊土還之朝廷惟生死以之耳爰泣誓文武
灑酒揮戈嚴守江渚未幾湖南一帶嘗武衡桂在在
烽起公調諸將分路堵截時獻賊破黃岡據武昌至
五月陷省城楚藩嬰禍公疾至長沙拒險扼要詎蒲

圻嘉魚等處奸民望風迎欵復陷岳州賊旣得岳所
謂洞庭之險與我共之遂大舉寇長沙水陸並逼公
護諸藩冒死斷後爲賊追縛檻送獻營公大罵不屈
賊以繩曳足倒拖地上剖腹剝臟而死南都贈左都
御史謚忠毅

推官蔡忠烈公道憲

號江門福建晉江人崇禎丁丑進士授長沙推官
崇禎十六年八月賊陷長沙公被執大罵磔之贈
太僕寺卿謚忠烈

在郡三年興大獄者二興大師者三公竭心力調護不
至大傷十五年冬賊襲荊州荆鎮率兵擁惠王走長
沙明年五月岳武昌殺士民十餘萬巡撫亦率千人
走長沙至八月陷岳州岳鎮孔希貴又率兵萬人走
長沙長沙恇擾公以一身經理其間勞悴倍嘗又以
郡中劣衿梗姓爭自開隙操挺刃而起公不得不借

武臣鎮壓之於是委重鎮守尹先民與之共事及賊犯城人無固志初誓衆死守躬持釜甑出粟食兵與孔鎮相犄角未幾孔先走降尹兵遂潰公督戰不支城陷公與知府周二南同被執百計誘降不屈置小樓中二十四日令降將尹先民說之卒不聽罵不絕口賊大怒磔之後贈太僕卿謚忠烈

長沙徼卒九人侍公不去賊百計迫公降卒林國俊曰吾主可降先去矣不待今日賊曰爾主不降爾亦不得生國俊曰若吾輩願生亦去矣亦何待今日賊併殺之內四卒請葬主骸而後受刃賊聽之四人解衣

裹屍葬畢各自盡

知州徐公世淳

字中明嘉興人萬曆戊午鄉薦歷官隨州知州城
陷死之

累試南宮不第遂赴選署永嘉縣教諭修學宮闢講堂
除重慶府推官督兵勦寇有功當內召蜀人疾公強
項沮之改隨州知州十三年十月蒞隨隨大荒公加
意賑恤預戒子肇森及肇櫟曰隨逼襄鄧且三破之
餘然郢之肩背也守隨所以衛陵櫟也行捍牧圉以
佐守森也居斥家財以佐軍吾必死此矣盟國人於
關壯繆廟誓以死殉

明年四月獻賊陷襄陽躡德安且逼隨公走使至郢告
急巡道趙某弗應撫軍發一將赴援趙勒之守郢留
弗遣公死守五日賊急攻南城潛師隳北城以入公
使子肇檠埋印署後勒馬巷戰矢貫於頤刀屬於頰
眼鼻橫斷墮馬慘死肇檠趨至拊尸頓踊哭且罵賊
擒至老營殺之且死猶疾呼州人告以埋印處妾趙
氏王氏臧獲十八人皆死越三日吳人石琳得公屍
歛之趙氏與申姑相抱不解胸函金剛經三寸許遂
并棺以歛而肇檠屍卒不可得巡道以阻援自諱欲
沒公死事狀荆西道力持之楚撫按乃上其事肇森

亦詣闕陳請天子贈公太僕少卿賜祠祭葬

知縣蕭公漢

號象石江西南豐人崇禎丁丑進士官鍾祥知縣
城陷死之

授鍾祥五年截俸行取聞襄陽陷自請護陵免覲壬午
十二月十一日賊逼境破關廂公奮袂呼曰此正吾
効死時也入署拜辭家廟出絹帨令衆媵自經曰男
忠女烈各宜自盡吾不能庇城中億萬生靈敢愛此
三十二口并兩雛乎於是麾鞭直走擐甲登陴拒守
六日夜賊益衆合數萬攻孤城至癸未元旦公擲劍
拜闕曰臣力竭矣急衝圍奔陵賊亦踵至公挺身大

呼曰鍾祥知縣在此不得擅驚陵寢賊卒挾之前公
引頸就刀賊終不殺遣僞官圓圭等說降以管夷吾
劉青田爲言公曰管仲不死以有母在我則白雲望
斷惟知向日郁離子痛鱗介之易我衣裳從龍淮右
我正值聖主英明金甌無缺事不相同死卽死耳勿
復言賊敬憚之不忍殺旋送至吉祥寺僧寮設美饌
奉之公大罵不食求死轉急覓死具不得偶於僧榻
獲剃刀藏之拾土塊書壁云鍾祥令蕭漢死此寺隨
對壁出刀自刎血橫濺字淋漓朱殷時正月初五日
也賊治櫬設奠就寺地瘞之

賊陷承天遣將決顯陵求寶偽官張聯奎多備鋏鋤舉
事忽風雷大作晝晦聯奎見金甲神持金瓜頂門一
擊卽昏仆亂道口鼻流血一夜而卒衆賊驚散

知縣房公景春

字和滿江都人萬曆壬子鄉薦歷官房縣知縣城陷死之

辛未就教鹽城鹽令貪且虐又歲饑民洶洶逞亂公多方解釋得散去尋罷歸移陝西苑馬寺萬安鹽錄事遷黃州照磨署篆黃安甫二日而賊掩至公誓以身與城存亡鼓勵士民登陴擊賊凡戰守八日夜賊遁去戊寅陞房縣知縣時總督熊文燦招九營大寇交斥鄖屬而羅汝才白貴黑雲祥三營介馬入房逼據西關公知事不可爲與主簿朱邦聞遊擊楊道選內

修守具外定盟書苟安旦夕

己卯五月張獻忠突入房蓋獻忠已破穀城縣令阮之
鈿死遂乘勝鼓行而西而新插三營羣起嚮應城中
兵羸餉缺公血書寸紙遣人縋城出求救不報獻忠
逼讓城公曰吾頭可斷城不可讓也賊益攻公發砲
殲賊賊以棺覆首四面環圍守門指揮張三錫爲內
應城陷遊擊楊道選巷戰死公被執勸降不從命拽
出斬之子生員鳴鸞抱父尸哭罵賊復手刃之僕陳
宜亦被殺主簿朱邦聞與其家人俱不屈死事聞贈
公太僕寺卿鳴鸞與陳宜俱祔祀

論曰公之節烈矣死忠死孝日月光昭而予所深恨者
當時督撫大吏明知疆事必壞而今日曰招明日曰
撫卒至流毒宗社不可收拾宜乎按臣某云可勦之
機會與能勦之物力俱撫裏挫過良可嘆也

知縣劉公振之

字而強號水壺慈谿人崇禎庚午鄉薦官鄆陵知縣城陷不屈死之年五十六事聞於朝贈太僕少卿

公生平留心聖學事繼母毛有古孝行先世素爲廉吏一簞一瓢泊如也三上公車不售因愛東陽山水遂受教諭至縣卽與諸生更始以實學相督課未幾陞鄆陵知縣因言東陽士風日惡不久將變起公甫去而難作人服其有先見治鄆陵以卹民爲務時流寇充斥軍士過邑索糧者迫縣宰萬狀至縛之去父老

帝號奔救歛貲以犒始釋歸邑中有通賊者言城小
不支降之便公正色叱之城陷公謁先聖秉笏坐堂
上賊至索印公不與賊縛公置雪中三日公猶罵不
絕口賊斫之十餘刀竟死黃公道周額其門曰忠孝
大儒公自己未歲書片楮藏之笥中每歲加紙護之
至是家人啓其封則不貪財不好色不惜死三語也

御史金公毓嗣

字鶴冲保定完縣人崇禎甲戌進士官至湖廣道
御史

舉乙卯賢書與從子肖孫讀書郎山相對慨然有澄清
之志登第官中書舍人辛巳秋面陳漕務稱旨特授
湖廣道監察御史尋上寬徵徭誅骫帥解黨錮慎銓
法諸疏每上必報可

出按秦川闖逆方窺函谷不敢入及公復命賊遂踰關
舉朝悔不久任云甲申春召對便殿因命出監軍宣
大公奉命出而宣雲告陷矣改命督禁旅往扼畿南

要害公冒矢石馳歸保郡散家貲千金犒士卒爲固
守計命從子武科振孫帥其軍振孫者肖孫弟也賊
圍急振孫登陴挾矢殪渠帥數人兄弟私誓曰一旦
有變必從季父於地下公聞之謂肖孫曰死易立孤
難我以弱子爲托肖孫拜受命公配王孺人盡出簪
珥寇帔以犒士士益奮願殺賊會三月十九日信至
公痛哭誓與城俱存亡隨懸銀牌以賞擊賊者士爭
殺賊爲君父報仇二十四辰刻城樓火起賊乘焰登
城遂陷振孫躍馬赴賊曰城頭殺爾帥者我也格鬪
斃數賊而衆寡不敵爲亂鋒所糜公裂眦大罵提劍

斬一綠衣賊負印望北叩首曰臣力竭矣投三皇廟
古井死一門男婦同殉者數人賊大索兩孤肖孫備
受炮烙慘刑體剝無完膚終以得免三日後肖孫
收公骸骨如生人義公之死而益稱肖孫之不負所
托也

按甲申之難所至望風降附無一嬰城守者况國破君
亡天崩地裂而保郡密邇京城獨固守不懈真睢陽
常山所再見矣

布政夏公萬亨

字元禮號葵南崑山人萬曆戊午鄉薦官至右布政乙酉八月被殺於建昌

初就教諭婺源率勵有方士皆悅服歲荒捐俸設糜以食饑者陞知西平時河南郡邑所在被賊公築隄治城練兵保甲爲禦賊計至悉而民不擾居三年改知夏邑聞賊將犯縣公兼程而赴旣至念地小民疲難以無賊外修武備而內以德綏民以義馭賊賊嘗頓兵城下公輒開門出責其爲盜不義或不聽命則曰寧殺我無殺我百姓賊相顧驚異稱爲好官好官不

明名臣言行錄卷九十一
殺一人而去有某賊逼處而疆公單騎諭降不持一
兵賊見公不疑感恩義欲受命歸欵以總兵劉超擊
之而止蓋是時郝良貴房星袁營闖曹皆河南巨寇
所過城郭無不摧滅獨夏邑無侵暴得全以令賢故
也

當超未叛公嘗署永城超用威凌厲公抗不屈及超殺
巡撫都御史王公漢朝命故督師丁公啟睿帥河南
軍討之諸道援者數萬而軍需器械悉公轉輸不三
月超就擒伏誅始以功上天子嘉之於是卽命公行
勸農副使事公益悉心撫輯加惠荒殘未幾而甲申

三月之變聞矣公北向慟哭曰萬亨當從死願尚有八十老母從皇上乞身空門以奉老母天年終耳公歸值南都建國柄國者以公諳中州情勢強使逆太后於河南公竟奉太后歸南都已而江西布政使之擢公在中州有豪右恣爲不法者公聞於巡按御史寘之理至是嗾諫垣劾公謂縣令不當超擢藩司遂以按察司僉事分巡南瑞公至江右益乙酉三月也國勢艱危人無固志公務爲整暇威惠兼施吏民以安初至兵請給餉旣給贏十之一公以詰吏吏曰此故事公所當有也公正色曰侵奪軍資吾豈爲之况

今何時者仍召軍人與之

保寧王時避寇南昌公知其家人豪橫爲民害適公出
有犯前導者執而笞之問知爲王家奴更笞之旣去
則呼召其黨皆持白梃圍公南昌震動無小大皆趨
王所謂王柰何殺吾夏巡道焚門入巡撫都御史下
令戢之不聽及公令至則曰夏巡道無恙我又何爲
遂去其得人心如此時在任未三月也

尋陞按察使兼布政使凡綰七印而南都陷事不可爲
公奉太夫人至撫州屬門生臨川令某將返南昌而
金帥已入金帥故左藩部將時已迎降素重公治行

先以書勸公達時變及至南昌不得公遣兵下撫州
下建昌欲必生致公公時奉益王命倡義建昌甫蒞
事而城潰執公往金帥待公有加禮欲援爲大吏以
撫江右南昌吏民又哀請於公堅不許書絕命辭示
志金帥知不可奪然終不欲害公爲其下潛送於楚
之佟大帥不屈被殺繼配顧夫人與子婦諸孫及僕
隸死於建昌者二十餘人時八月廿一日也太夫人
則幸季子及孫無恙得歸

明名臣言行錄卷第九十

終